

四庫全書

子部

欽定四庫全書

釋編卷四

明 唐順之 撰

易三

周易略例

王 弼

明彖夫彖者何也統論一卦之體明其所由之主者也
夫衆不能治衆治衆者至寡者也夫動不能制動制天
下之動者貞夫一者也故衆之所以得咸存者主必致
一也動之所以得咸運者原必無二也物无妄然必由

其理統之有宗會之有元故繁而不亂衆而不惑故六
爻相錯可舉一以明也剛柔相乘可立主以定也是故
雜物撰德辨是與非則非其中爻莫之備矣故自統而
尋之物雖衆則知可以執一御也由本以觀之義雖博
則知可以一名舉也故處璇璣以觀大運則天地之動
未足怪也據會要以觀方來則六合輻輳未足多也故
舉卦之名義有主矣觀其彖辭則思過半矣夫古今雖
殊軍國異容中之為用故未可遠也品制萬變宗主存

焉彖之所尚斯為盛矣夫少者多之所貴也寡者衆之所宗也一卦五陽而一陰則一陰為主矣五陰而一陽則一陽為主矣夫陰之所求者陽也陽之所求者陰也陽苟一焉五陰何得不同而歸之陰苟隻焉五陽何得不同而從之故陰爻雖賤而為一卦之主者處其至少之地也或有遺爻而舉二體者卦體不由乎爻也繁而不憂亂變而不憂惑約以存博簡以濟衆其惟彖乎亂而不能惑變而不能渝非天下之至蹟其孰能與

於此故觀彖以斯義可見矣

明爻通變夫爻者何也言乎變者也變者何也情偽之所為也夫情偽之動非數之所求也故合散屈伸與體相乖形躁好靜質柔愛剛體與情反質與願違巧厯不能定其算數聖明不能為之典要法制所不能齊度量所不能均也為之乎豈在夫大哉陵三軍者或懼於朝廷之儀暴威武者或困於酒色之娛近不必比遠不必乖同聲相應高下不必均也同氣相求體質不必齊也

召雲者龍命呂者律故二女相違而剛柔合體隆墀永
歎遠壑必盈投戈散地則六親不能相保同舟而濟則
胡越何患乎異心故苟識其情不憂乖遠苟明其趣不
煩彊武能說諸心能研諸慮睽而知其類異而知其通
其唯明爻者乎故有善邇而遠至命宮而商應脩下而
高者降與彼而取此者服矣是故情偽相感遠近相追
愛惡相攻屈伸相推見情者獲直往則違故擬議以成
其變化語成而後有格不知其所以為主鼓舞而天下

從見乎其情者也是故範圍天地之化而不過曲成萬物而不遺通乎晝夜之道而無體一陰一陽而無窮非天下之至變其孰能與於此哉是故卦以存時爻以示變

明卦適變通爻夫卦者時也爻者適時之變者也夫時有否泰故用有行藏卦有小大故辭有險易一時之制可反而用也一時之吉可反而凶也故卦以反對而爻亦皆變是故用無常道事無軌度動靜屈伸唯變所適

故名其卦則吉凶從其類存其時則動靜應其用尋名以觀其吉凶舉時以觀其動靜則一體之變由斯見矣夫應者同志之象也位者爻所處之象也承乘者逆順之象也遠近者險易之象也內外者出處之象也初上者終始之象也是故雖遠而可以動者得其應也雖險而可以處者得其時也弱而不懼於敵者得所據也憂而不懼於亂者得所附也柔而不憂於斷者得所御也雖後而敢為之先者應其始也物競而獨安靜者要其

終也故觀變動者存乎應察安危者存乎位辨逆順者存乎承乘明出處者存乎外內近遠終始各存其會辟險尚遠趣時貴近比復好先乾壯惡首明夷務闇豐尚光大吉凶有時不可犯也動靜有適不可過也犯時之忌罪不在大失其所適過不在深動天下滅君主而不可危也侮妻子用顏色而不可易也故當其列貴賤之時其位不可犯也遇其憂悔吝之時其介不可慢也觀爻思變變斯盡矣

明象夫象者出意者也言者明象者也盡意莫若象盡
象莫若言言主于象故可尋言以觀象象主於意故可
尋象以觀意意以象盡象以言著故言者所以明象得
象而忘言象者所以存意得意而忘象猶蹄者所以在
兔得兔而忘蹄筌者所以在魚得魚而忘筌也然則言
者象之蹄也象者意之筌也是故存言者非得象者也
存象者非得意者也象生於意而存象焉則所存者乃
非其象也言生於象而存言焉則所存者乃非其言也

然則忘象者乃得意者也忘言者乃得象者也得意在忘象得象在忘言故立象以盡意而象可忘也重畫以盡情而畫可忘也是故觸類可為其象合義可為其徵義苟在健何必馬乎類苟在順何必牛乎爻苟合順何必坤乃為牛義苟應健何必乾乃為馬而或者定馬於乾案文責卦有馬無乾則偽說滋蔓難可紀矣互體不足遂及卦變變又不足推致五行一失其原巧愈彌甚縱復或值而義無所取蓋存象忘意之由也忘象以求

其意義斯見矣

辨位案象无初上得位失位之文又繫辭但論三五二
四同功異位亦不及初上何乎唯乾上九文言云貴而
无位需上六云雖不當位若以上為陰位邪則需上六
不得云不當位也若以上為陽位邪則乾上九不得云
貴而无位也陰陽處之皆云非位而初亦不說當位失
位也然則初上者是事之終始无陰陽定位也故乾初
謂之潛過五謂之无位未有處其位而云潛上有位而

云无者也歷觀衆卦盡亦如之初上无陰陽定位亦以明矣夫位者列貴賤之地待才用之宅也爻者守位分之任應貴賤之序者也位有尊卑爻有陰陽尊者陽之所處卑者陰之所履也故以尊為陽位卑為陰位去初上而論位分則三五各在一卦之上亦何得不謂之陽位二四各在一卦之下亦何得不謂之陰位初上者體之終始事之先後也故位无常分事无常所非可以陰陽定也尊卑有常序終始无常主故繫辭但論四爻功

位之通例而不及初上之定位也然事不可無終始卦不可無六爻初上雖無陰陽本位是終始之地也統而論之爻之所處則謂之位卦以六爻為成則不得不謂之六位時成也

論初上

陸 秉

義海

略例言初上無定位斯得其言未得其象也夫六位者六虛之所存剛柔相易便為陰陽吉凶之物然位有得中違中之間故五得中而多功三違中而多凶二得中

而多譽四逼中而多懼初則遠而居下上則過而踰極
是以剛柔取之更相為物如乾之上九乃獨陽之爻亢
極失中宜曰无位而有悔也若需之上六居獨陰之地
踰中履險故云雖不當位亦其宜矣本末無常吉凶從
類豈有定乎大率二與四非專為陰三與五非專為陽
六位次第之序但二與五得中三與四違中雖皆在有
為之地履進退之著誠有貴賤遠近而多功多凶多譽
多懼也二既多譽則初為事始未甚有為雖或無譽其

於多懼也必且有間矣三之多凶既其有為則上之踰極雖不為物制其於多凶也抑亦有是焉五既得中又居尊盛之位有為之貴莫尚於斯其為多功不亦宜乎若初與上夫子所以不論者舉四位以類推之斯可知矣

論初上無陰陽定位

全君卿

義海

乾之初九易陽之位但陽德未亨藏其用爾故謂之潛上九易陰之位但以亢陽非君之位故云元位需之上

六以一陰居卦之極履非君位而為三陽之主故云雖不當位非謂無陰陽定位輔嗣但以乾需二卦觀之故謂諸卦初上皆無陰陽定位又其辨位之說直以卦下之爻為陰卦上之爻為陽此又失之遠矣夫陰陽本位但以數而言初三五本奇數乃陽之定位也二四六本偶數乃陰之定位也至于揲卦爻以時成或動而之變得老陰老陽少陰少陽剛柔之體各乘其時而來居其位得君臣父子夫婦賓主之象故其間有陰陽得其本

位者或有以陰居陽以陽居陰者或有為卦之主而非君位者或有得君位而非為一卦之主者故象有失位得位之文惟初上是卦體之始末非居中得正之位爾若下繫之三章云六爻相雜惟其時物也其初難知其上易知初辭擬之卒成之終若夫雜物撰德辨是與非則非其中爻不備次章始有三與五二與四同功異位之說是亦先論初上之位矣亦不言无位也又繫辭云兼三才而兩之故六六者非他也三才之道也若只以

居中四爻為有位邪則三才之位缺而不備矣又說卦云易六位而成章文言云六位時成既有六位之說而顧云無位未知其可也

讀易私言

許衡

初初位之下事之始也以陽居之才可以有為矣或恐其不安於分也以陰居之不患其過越矣或恐其懦弱昏滯不足以趨時也四之應否亦類此義無應則或嫌於弱有應則或傷於躁坎無應而大抵柔弱則難濟剛健則易行故頤有應皆凶之類也

諸卦柔弱而致凶者其數居多

豫坎恒困井旅小過未濟

剛健而致凶

者惟頤大壯夬而已若總言之居初者易貞居上者難貞易貞者由其所適之道多難貞者以其所處之位極故六十四卦初爻多得免咎而上每有不可救者始終之際其難易之不同蓋如此

艮六居初者凡八陰柔處下而其性好止故在謙則合時義而得吉在咸則感未深而不足進也以是才居遯則後於人而有厲然位卑力弱反不若不往之為愈也蹇之時

險在前也止而不往自有知幾之譽勉於進則陷乎險也
艮以止於初為義故但戒以利永貞漸之才宜若此也雖小
子有言於義何咎旅雖有應而不足援也斯其所以瑣瑣
乎小過宜乎下而反應於上斯其有飛鳥之凶乎柔止之
才大率不宜動而有應動而有應則應反為之累矣
謙吉小
過凶
坤六居初者凡八坤柔順處下其初甚微而其積甚著故
其處比與否之初也皆獲吉豫有應在上是動於欲而不
安其分也凶亦宜乎

二與四皆陰位也四雖得正而猶有不中之累況不得其正乎二雖不正而猶有得中之美況正而得中者乎四近君之臣也二遠君之臣也其勢又不同此二之所以多譽四之所以多懼也二中位陰陽處之皆為得中中者不偏不倚無過不及之謂其才若此故於其時義為易合時義既合則吉可斷矣究而言之凡陽本吉凡陰本凶陽雖吉不得其正則害乎吉矣得正矣不及其中亦未保其吉也必當位居中能趨時義然後其吉

乃定陰雖本凶不失其正則緩其凶矣正矣或能居中
猶可免其凶也必也不正中悖於時義其凶乃定故
陽得位得中其吉多焉陰失位失中其凶多焉要其終
也合於時義則無不吉悖於時義則無不凶也大矣哉
時之義乎

乾九二九剛健之才也而承乘又剛健是剛健之至也
處陰得中有溥博淵泉時出之義臣才若此其於職位
蓋綽綽然有餘裕矣夫剛健則有可久之義得中則有

適時之義兼是二者雖無應可也況九五虛中以待己者乎此八卦所以無悔吝而有應者尤為美也

兌九二兌之九二剛而得中也雖上承於柔邪不足為累此以得中之義為勝也獨節之為卦自有中義所不足者正而已今既不正矣其何以免於凶乎

巽九二兌之中以剛為說巽之中以剛為入皆有才適用之臣也然兌務於上

上一陰為主

巽務於下

下一陰為主

其勢

有所不同如井之義貴於上行也而九二無應徇己才

而下之違時拂義人莫肯與以谷射甕敝取象其亦宜乎

坎九二下柔險之始也上柔險之極也而已以剛陽之才獨處中焉是己無賴於彼而彼有待於己也加以至尊應之則險道大行不爾則幾於困矣大率有應而道行則以貞幹之義為重無應而處中則以須守之義為重錯舉而言則卦才皆備焉

坤六二否之時不為窮厄所動豫之時不為逸欲所牽

非安於義分者莫能也坤六二居中履正且又靜而順
焉宜其處而無敗也雖然創物兼人陽之為也柔順貞
靜陰之德也以陰之德而遇剝觀則剝傷於柔而觀失
於固矣夫何故時既不同義亦隨異此六爻所以貴中
正而中正之中又有隨時之義也

震六二六二陰柔而在動體雖居中履正然下乘剛陽
成卦之主其勢不得安而處也非惟其勢不得安而處
揆其資性亦不肯安其處也或上應或下依有失得之

辨焉復無應而下仁吉之道也過此則違道而非正矣
頤隨益之時方受彼也上下之來又何患焉无妄之世
方存誠也或應或依祇足為累他卦皆不以乘剛之義
為重也屯震噬嗑大率處則乘剛動有得失非坤二柔
中之比也

艮六二以剛處上以柔處下尊卑之勢順也艮之大體
既備此象矣而六二又承剛履柔居中得正宜其處諸
卦而無過也雖然柔止之才動拘禮制若當大有為之

時則有不可必者故在塞未能濟處艮莫能止究其用心忠義正直終不可以事之成否為累也

離六二初與三剛而得正皆有為之才也然其明照各滯一偏唯六二中正見義理之當然而其才幹有不逮其明者甚矣才智之難齊也得有應於上則明有所附矣然非剛之善用明實明之能自用也大抵以剛用明不若以明用剛之為順故八卦應五附三其勢略等而離之六五有應於下者為最美也

三卦爻六位唯三為難處蓋上下之交內外之際非平易安和之所也故在乾則失於剛暴在坤則失於柔邪震動而無恒巽躁而或屈離與艮明止繫於一偏坎與兌險說過極皆凶之道也然乾之健雖不中猶可勝任坤之順雖不正猶能下人二者之凶比他爻為少緩若夫坎之與兌以陰處陽以柔乘剛不中不正悖忤時義其為凶也切矣是知乾坤為輕坎兌為重總而論之亦曰多凶而已矣

乾九三過剛而不中難以與義適然以其有才也故諄諄為戒命之曰夕惕曰敬慎曰艱貞庶乎有可免者不然則用所偏而違乎義矣凶其可逃乎

四四之位近君多懼之地也以柔居之則有順從之美以剛居之則有僭逼之嫌然又須問居五者陰邪陽邪以陰承陽則得於君而勢順以陽承陰則得於君而勢逆勢順則無不可也勢逆則猶忌上行上行則凶咎必至離之諸四皆是也震則四為成卦之主才幹之臣也

是動而知戒是以有補過之道以陽乘陽以陰乘陰皆不得於君也然陽以不正而有才陰以得正而無才故其勢不同有才而不正則貴於寡欲故乾之諸四例得免咎而隨之四夬之四有凶悔之辭焉無才而得正則貴乎有應故艮之諸四皆以有應為優無應為劣獨坤之諸四能柔順處之雖無應援亦皆免咎此又隨時之義也

乾九四九而居四勢本不順然以其健而有才焉故不

難於趨義又上卦之初未至過極故多為以剛用柔之義以剛而用柔是有才而能戒懼也有才而能戒懼雖不正猶吉也

兌九四處下而說則有樂天之美處上而說則有慕爵之嫌初九雖無應猶可也九四雖有應尚多戒辭也然以剛說之才易得勝任故有應者無不吉而無應者亦有勉之道云

離九四陽處近君而能保其吉者以其有才而敬慎故

也火性上炎動或躁急非惟不順君之所用且反為君之所忌也恣橫專逼鮮有不及禍惟噬嗑之去間睽離之相保與羈旅而親寡之時取君義為甚輕故其所失亦比他爻為甚緩究而言之固非本善之才也

震九四離之成卦在乎中故以中為美震之成卦在乎下故以下為貴若是則震之九四乃才幹之臣也君之動由之師之動亦由之其功大矣其位已逼然而卒保無禍者何哉蓋震而近君有戒愼恐懼之義以陽處陰

有體剛用柔之義持是術以往其多功而寡過也宜乎
雖然功大位逼而不正不可以久居其所也久居其所
則勳德反下此恒之所以戒於田无禽歟

巽六四陰柔之質自多懼也順入之才能承君也以是
而處每堪其任故八卦皆無凶悔之辭

坎六四其以陰柔得位而上承中正之君略與巽同然
又有險之性焉以此處多懼之地則宜矣故八卦亦無

凶悔之辭

一作陰承陽其勢已順而其才質且能周還
曲折不違於正道是宜處多懼而无咎也

艮六四以柔止之才承柔止之君雖己身得正而於君
事則有不能自濟者必藉剛陽之才而後可以成功故
離九應之則終得婚媾震九應之則顛頤獲吉至于止
乾之健納兌之說皆可成功而有喜不爾處剥見凶處
蒙蠱見吝矣艮以能止為義能止其身則无咎可也

坤六四坤之六四不問有應與否皆無凶咎蓋為臣之
道大體主順不順則無以事君也

五五上卦之中乃人君之位也諸爻之德莫精於此故

在乾則剛健而斷在坤則重厚而順未或有先之者至於坎險之孚誠離麗之文明巽順於理艮篤於實皆能首出乎庶物不問何時克濟大事傳謂五多功者此也獨震忌強輔兌比小人於君道未善觀其戒之之辭則可知

乾九五剛健中正處得君位不問何時皆無悔吝惟履之剛決同人之私暱不合君道故有厲有號咷也

兌九五下履不正之強輔上比柔邪之小人非君之善

道也然以其中正也故下有忌而可勝上有說而可決
大哉中正之為德也

離六五強輔強師而六以文明柔中之才而麗之悔可
忘也事可濟也然更得九二應之為貴故大有睽鼎未
濟皆吉而他卦止以得位得中而免耳

震六五九四陽剛不正之臣為動之主而六五以柔中
乘之其勢可嫌也得九二剛中應之其勢頗振動故恒
大壯解歸妹比他卦為優而豐之二五以明動相資故

其辭亦異焉勝於豫震小過之無應也

巽九五以巽處中正又君臣相得而剛柔相濟相得則無內難相濟則有成功不待於應自可无咎應則尤為美也

坎九五以剛陽之才處極尊之位中而且正可以有為也然適在險中未能遽出故諸卦皆有須待之義夫能為者才也得為者位也可為者時也有才位而無其時惟待為可待而至於可則无咎矣

艮六五君輔皆柔且無相得之義本不可有為也以六有靜止得中之才上依而下任也故僅能成功然非可大有為也更或無應是不得於臣又不得於民於君道何取焉

坤六五坤六居五雖不當位然柔順重厚合於時中有君人之度焉得九二剛中應之則事乃可濟故師泰臨升或吉或无咎而他卦則戒之之辭為尤重蓋陰柔之才不克大事且鮮能永貞故也

上上事之終時之極也其才之剛柔內之應否雖或取

義不一然終莫及上與終之重也是故難之將出者則

指其可由之方

否解困
渙未濟

事之既成者則示以可保之道

益无妄頤
家人萃漸

才適時甚足貴也

隨離
臨艮

時過適則難與行也

乾坤小畜泰節中孚大
過恒益艮兌小過既濟

義之善或不必勸則直云其吉

也

大有剥大
畜遯睽鼎

勢之惡或不可解則但言其凶也

屯訟比
噬嗑復

坎明夷夬歸妹豐
旅巽小過既濟

有始不得志而終無悔吝者

同人
姤

有

始饜其欲而終有禍敗者

萃

因其偏而用者才可尚也

蒙晉升

反其常而動者事已窮也

師謙 資損

質雖不美而冀其

或改焉則猶告之

大壯 益 震節

位雖處極而見其可行焉則

亦與之

需 蹇

艮有成終之義故八卦皆善

蒙 蠱 賁 剝 大畜 頤 損 艮

履

係於所履觀係於所生吉凶不敢主言也大抵積微而盛過盛而衰有不可變者有不能不變者六爻教戒之辭惟此為最少大傳謂其上易知豈非事之已成乎

易總論

王弼

乾坤成列震巽始出坎離居中艮兌在末制用之名也

天地定位山澤通氣雷風相薄水火相逮寫載之形也
形以寫載為象名以觀象為義故象者意之跡而名者
象之為也夫卦以應時治亂時也爻以適時變通時也
世有解蹇故功有利害時有濟否故業有變通是以大
人君子虎豹其變而通之以盡利也靜則象潛龍以遜
世動則宜在田以見德巨則彌綸天地之外細則曲成
秋毫之內物無不麗乎理事無不由乎道道義之門於
斯乎存故二五多功三四多凶違世惡變適時貴中大

畜尚積明夷好昧豫損在進謙益在退為之有才用之
有時得失有地進退有司不誣也夫動得所感雖獨不
懼靜得所恒雖雜不著故卦有幽明治亂之象也爻有
內外貴賤之象也位有剛柔靜躁之象也感不以義雖
邇而不可懷也應必以理雖遠而不可棄也剛未必勝
失所據也柔未必危得所御也夫適時之變不在多算
合世之功不待博救統之有宗理之有主善從事者司
契而已故言易知行易從也

夫彖者何也統其二象之材以言乎卦斷者也卦有晦明則爻有陰陽之義位有剛柔故才有靜躁之宜二五多譽卦之宗也三四多懼爻失中也苟獲其中雖弱必治苟非其正雖強必災是以大有六五柔非其體在卦之宗雖柔猶吉同人九三剛得其位非爻之中雖剛猶危強而失正則強不足安弱而得中則弱不足患東鄰百勝而亳社斯喪周雖陶穴而有汝墳自此觀之斷可識矣知其斷者明乎彖者也是故上天下澤謂之履此

稱物而言者也見險而止謂之蹇此度時而言者也是故義有通蹇則事形于出處才有躁靜則闕見其語默若困之有言不信乖於時者也節之不出門庭違於出者也違世之怨怨不在細乖時之宜咎不在大匪言之難處言難也匪行之易知行易也是故雖物之雜而中爻備其義焉雖象之衆而斷辭具其材焉必材之具名不患寡必義之備爻不待衆卦之德乾名雖約也而六龍為之御天品物為之流形位之在五爻雖一也而天

下為之感應羣體為之致用靜言其要要在乎彖明者以之大觀其思豈細故哉

夫象者何也總言一卦之體因外物以設名者也聖人有以見天下之至赜而擬諸其形容大則包天地以貞觀小則備萬物以取類是故言不足多言有遺也象不足異象有外也忘跡者行之適也舍物者神之全也外其象以求志而理可見矣遺其言以觀象而事可察矣夫責言者則以文害志而有象者則以物妨情情之所

適若循環之無窮理之所生若轉圓之無方千變可為之圖萬物可為之容觸類而長之備物而象之斯可以觀意為足不可以審象為善也故或相傾以辯或相危以亂此貴口者之累也不為月辰錯順之候正求星厯妖異之占此存象者之貴也獨不聞聖人之言邪易曰公用射隼于高墉之上獲之无不利子曰隼者禽也弓矢者器也射之者人也君子藏器于身待時而動何不利之有動而不括是以出而有獲語成器而動者也聖

人之言既自如斯分別明白可謂無外矣而好事者方始為之辭焉卦有震坎之象爻又有離雷震百里諸侯上公之位也積爻累象有似高墉坎為弓輪又為隱伏離為龍鳥又為戈兵兵而隱伏藏器之象兵及飛鳥獲之之義難者猶嫌其濶略射必假手而艮象於類不通專自疑惑則彼說滋章聖人攻乎異端而誣罔始興迷誤後昆其游孔門不觀其議也

夫體義者在乎象變通者存乎爻大人者形與萬物接

神與造化偕入則乘潛龍出則乘飛龍遠以觀道邇以
瞻器其數無軌而不可既也君子者健以行志非以神
明變通者也故自強不息以行其志君子之道也惟可
與於健之體義而未可與於健之變通也故於象稱君
子舉其體義者也於爻稱大人敘其變通者也或有在
爻而稱大人者義則盡於象故也若離之為明其何不
照變而通之無所不造故其象云大人繼明照于四方
也或有在爻而稱大人者義有待於變故也若否卦全

說君子避難不榮於祿與時通塞可以適否而安其身
未足以兼善天下在否而休也惟大人為能休天地之
否達濟凝滯開闡幽門所謂變否而亨者也故六二云
大人否亨而九五云大人休否也夫象贍而爻不足者
離卦之類是也義盡於象而不待于爻也爻備而象不
具者否卦之類是也象所未盡而待爻以備也故象以
體示而爻以變明存斯以考其義則窮通之旨顯而開
塞之塗見矣

夫彖者全論一卦之體而象者各舉一爻之義一卦所無世之遺也爻或有焉才之所生也故才生於世所不足觀其逆順以定得失之占察其乖合以明休咎之徵若小畜卦稱密雲不雨而上九爻云既雨既處在於不雨之時而獨以能雨為德者存乎物之所欲也若履卦稱履虎尾不咥人亨而六三爻云履虎尾咥人凶在于履亨之時而獨以見咥為凶者存乎衆之所忌也夫負世之才雖小無易適時之望雖大無難是以君子洗心

知終將有為也問焉而動每居其適斯可以旁通而無
際矣

夫神以知來來無方也智以藏往往有常也物有常然
猶方之有所止數無常體猶圓之無所窮故著之變通
以設神之象也卦別爻分辭有典常智之類也智有所
止可以多識前言往行神無所窮可以逆照來事之會
故著圓以象神卦方以象智也

周易正義序

孔穎達

夫易者象也爻者效也聖人有以仰觀俯察象天地而育羣品雲行雨施效四時以生萬物若用之以順則兩儀序而百物和若行之以逆則六位傾而五行亂故王者動必則天地之道不使一物失其性行必協陰陽之宜不使一物受其害故能彌綸宇宙酬酢神明宗社所以無窮風聲所以不朽非夫道極玄妙孰能與於此乎斯乃乾坤之大造生靈之所益也若夫龍出于河則八卦宣其象麟傷于澤則十翼彰其用業資九聖時歷三

古及秦亡金鏡未墜斯文漢理珠囊重興儒雅其傳易者西都則有丁孟京田東都則有荀劉馬鄭大體更相祖述非有絕倫惟魏世王輔嗣之注獨冠古今所以江左諸儒並傳其學河北學者罕能及之其江南義疏十有餘家皆辭尚虛玄義多浮誕原夫易理難窮雖復玄之又玄至于垂範作則便是有而教有若論住內住外之空就能就所之說斯乃義涉于釋氏非為教于孔門也既背其本又違于注至若復卦云七日來復並解云

七日當為七月謂陽氣從五月建午而消至十一月建子始復所歷七辰故云七月今案輔嗣注云陽氣始剝盡至來復時凡七日則是陽氣剝盡之後凡經七日始復但陽氣雖建午始消至建戌之月陽氣猶在何得稱七月來復故鄭康成引易緯之說建戌之月以陽氣既盡建亥之月純陰用事至建子之月陽氣始生隔此純陰一卦卦主六日七分舉其成數言之而云七日來復仲尼之緯分明輔嗣之注若此康成之說遺跡可尋輔

嗣注之于前諸儒背之于後考其義理其可通乎文盡
卦云先甲三日後甲三日輔嗣注云甲者創制之令又
若漢世之時甲令乙令也輔嗣又云令治乃誅故後之
三日又巽卦云先庚三日後庚三日輔嗣注云申命令
謂之庚輔嗣又云甲庚皆申命之謂也諸儒同于鄭氏
之說以為甲者宣令之日先之三日而用辛也欲取改
新之義後之三日而用丁也取其丁寧之義王氏注意
本不如此而又不顧其注妄作異端今既奉勅刪定考

察其事必以仲尼為宗義理可詮先以輔嗣為本去其華而取其實欲使信而有徵其文簡其理約寡而制衆變而能通仍恐鄙才短見意未周盡謹與博士馬嘉運助教趙乾叶等對共參議詳其可否為之正義凡十有四卷庶望上裨聖道下益將來故序其大略附之卷首爾

七日來復之義

章俊卿

孔穎達曰王弼注謂陽氣始剥盡至來復時凡經七日

其注分明如褚氏莊氏竝云五月一陰生至十一月一陽生凡七月而云七日不云月者欲覘陽長須速故變月言日今輔嗣云剝盡至來復是從盡至來復經七日也若從五月言之何得云始盡也又臨卦亦是陽長而言八月今復卦亦是陽長何以獨變月而稱七日觀注之意必謂不然亦用易緯六日七分之義同鄭康成之說案易緯稽覽圖云卦氣起中孚故離坎震兌各主一方其餘六十卦卦有六爻爻別主一日凡主三百六十

日餘有五十四分日之一又每日分為八十分五日分
為四百分四分日之一又為二十分是四百二十分六
十卦分之六七四十二卦別各得七分是每卦得六日
七分也剝卦陽氣之盡在於九月之末十月當純坤用
事坤卦有六日七分坤卦之盡則復卦陽來是從剝盡
至陽氣來復隔坤之一卦六日七分舉成數言之故輔
嗣言凡七日也

胡旦曰九月為剝是陽氣之極盛至十一月則一陽之

氣潛復于黃鍾之宮以再生萬物而萬物得其亨通亦
猶君子時有否泰始為小人之所剥及其得位發事業
于天下其道大通矣陽氣消剥至此凡歷七爻故謂之
七日蓋日為陽聖人政見陽道來復之速故以七日言
之

王昭素曰注䷖竝違夫子之義序卦云物不可以終盡
剥窮上反下故受之以復以此卦不剥盡也况剥上九
有一陽取碩果之象碩果則不剥盡矣坤為十月卦十

月純陰用事猶有陽氣在內故薺麥先生直至坤卦之末尚有龍戰之象龍亦陽也假此運有剝喪之時則商王受剝喪元良賊殺諫輔乃至億兆夷人離心離德當此之時豈無西伯之聖箕子之賢乎則賴陽氣必無剝盡之理矣

胡旦曰夫積陽則萎凝冰則壯男老則弱女壯則雄故薺草死於始夏薺麥生於孟冬數已盡而氣存時已極而物反天地之常理陰陽之本性陰之極有龍戰之災

故剝盡則復窮上反下皆正理也言窮者剝之盡也言反者復之初也何則西伯箕子非剝喪之人哉昭素未之辨也

朱震曰陰剝陽盡而成坤陰極陽反而成復天之行也以時言之九月剝十月坤十一月復以理言之陽無剝盡之理故坤之上六龍戰于野為其嫌於无陽也上六則十月也說卦曰乾西北方之卦也西北方亦十月也序卦曰物不可以終盡剝窮上反下故受之以復非特

此也五月一陰生其卦為姤積而成坤故坤下有伏乾十一月一陽生其卦為復積而成乾故乾下有伏坤反復相明以見生生無窮之意蓋書不盡言言不盡意天地陰陽不可以一言盡故也王胡達序卦之義而未盡說卦變卦之妙是以其論數若此然各有所長不可掩也

王昭素曰注云至來復時凡七日注用凡字取七日之義即約酌而已然未見指歸疏引易緯六日七分坤卦

之盡則復卦陽來疏文此說未見雅當六日七分是六十四卦分配一歲中之時日之數今復卦是乾坤二卦陰陽反復之義疏若實用六日七分以為坤卦之盡復卦陽來則十月之節終一陽便來也不得到冬至之日矣據其節終尚去冬至十五日則卦七日之義難用易緯之數矣

胡旦曰西漢京房以卦氣言事皆有效驗東都郎顗明六日七分之學最為精妙夫卦之爻則實數也歲之日

則虛數也歲月不盡之日積而為閏則加算焉六日七分實數也三百六十五日有餘焉故算而為閏昭素言從十月終至冬至尚有十五日未明歲月之積閏術數之精妙也惜乎緯文喪矣京房之言學者難知惟憑臆說後生穿鑿罕得師資是以紛然而致論也

朱震曰昭素於九月剝十月坤十一月復而不知此言其大綱爾坎離震兌各主一方六十卦分主一歲卦有六爻爻主一日凡三百六十日餘五日四分日之一又

分于六十卦每卦六日七分氣之進退推盪而成如九月剥
也有艮有既濟有噬嗑有大過凡五卦而後成坤十月坤
也有未濟有蹇有頤有中孚凡五卦而後成復說卦言
坎北方之卦也震東方之卦也離南方之卦也兌正秋
也於三卦言方則知坎離震兌各主一方矣於兌言正
秋者秋分也兌言秋分則震春分坎冬至離夏至為四
正矣復大象曰先王以至日閉關所謂至日者冬至也
於復言冬至日則姤為夏至而十二月消息之卦可知

矣復彖曰七日來復則六十卦分主一歲卦有六爻爻主一日可知矣繫辭曰三百八十四爻當期之日蓋六十卦當三百六十日四卦主十二節十二中氣所餘五日則積分成閏也

章氏曰自大綱而言則剝九月坤十月復十一月故京房曰剝復相去三十日別而言之復主冬至冬至中氣起於中孚自中孚之後七日而復故曰七日來復譬如辰為天樞不動之處猶在極星之下聖人之言居其所

者曰北辰而占天者必曰極星之下詳略異也歷代先
儒惟玄得其旨故玄一中二美三從四更五晬六廓七
減八沈九成中者象中孚之卦冬至之節日起牛宿一
度斗建子律中黃鍾夏后氏之十一月也其入牛宿之
五度為周周者象復卦冬至之後周復也宋衷陸績曰
易七日來復是也夫京房學于焦贛其說則臨於易自
揚子雲馬融鄭康成宋衷虞翻陸績范望並傳此學而
昭素非之不知其何所見邪

論卦氣六日七分

全君卿

乾坤二卦天地闔闢陰陽終始於其間故曰乾坤為易之門也陽不得陰之助不能任以生物陰不得陽之助不能任以成物乾坤二卦六陰六陽天地盈虛消長之道配於四時十二月周而復始若夫坤之純陰用事十月之卦也上六陰極而陽復故乾之初九來居坤之初位是為復此乾之一陽用事十一月卦也以至乾之九二來居坤之二位是為臨此乾之二陽用事十二月卦

也又乾之九三來居坤之三位是為泰此乾之三陽用
事正月卦也又乾之九四來居坤之四位是為大壯此
乾之四陽用事二月卦也又乾之九五來居坤之五位
而為夬此乾之五陽用事三月卦也及夫乾之上九來
居坤之上位而夬之上六一陰為五陽決去故六位純
陽復歸于乾純陽用事四月卦也乾之上九亢極矣故
復歸于坤坤之初六來居乾之初位是為姤此坤之一
陰用事五月卦也以至坤之六二來居乾之二位是為

遜此坤之二陰用事六月卦也以至坤之六三來居乾之三位是為否此坤之下體三陰用事七月卦也又坤之六四來居乾之四位是為觀此坤之四陰用事八月卦也坤之六五來居乾之五位是為剝此坤之五陰用事九月卦也坤之上六來居剝之上九陰來居陽剝落也故六位純陰復歸于坤上六用事十月卦也陰極則陽來故復歸于乾觀乾坤六爻之動則十二月陰陽代謝之功畢矣復一陽生故曰七日來復天行也利有攸

往剛長也臨二陽生故曰剛浸而長也姤一陰生故曰
柔遇剛也一陰之來小人道亨故變復而為姤遯二陰
生故曰浸而長也二陰之長君子之道消故變臨為遯
夬五陽並進上一陰將隕而衆陽之盛君子之道亨以
剛決柔故變剝而為夬夬決也剛決柔也利有攸往剛
長乃終也剝五陰並進上一陽將落而衆陰之盛小人
之道亨然柔不能以決剛而剛自隕故變夬為剝易曰
剝剝也柔變剛也不利有攸往小人長也觀夫陰陽相

生剛柔迭用四時之所變化萬物之所終始莫不備於斯矣復卦云七日來復或者謂日當為月言自五月陽剝而陰長以至於十一月而一陽生是七月而來復也明矣輔嗣云來復者七日諸儒妄為異端引易六日七分之說夫六日七分之說以謂一日八十分一卦之內六爻主六日而只餘七分耳即當繫舉六日而言之不當云七日也又况六十四卦以每卦管六日即當有三百八十四日又每卦益之以七分計有四百四十分得

五日餘四十八分總其數當有三百八十九日餘四十八分則當暮之數終矣說者無所依據故妄以震離兌坎為四方之卦獨不繫於日闕震離兌坎二至二分用事之月師云用事之月豈闕繫於日且乾坤於八卦為父母為天地萬物之祖何為亦只主六日七分之數如是則一歲四時之中乾坤所主者十二日一十四分乾坤之用於天地四時之功何其小也孔穎達云剝卦陽氣之盡在於九月之末十月當純坤用事坤卦有六日

七分坤卦之盡則復卦陽來是從剝至陽復隔坤之卦
六日七分舉成數言之故輔嗣云七日也如穎達之論
何不思之甚也夫自五月坤之初六一陰用事至于十
月坤之上六純陰用事是坤之六爻於一歲中主六月
設只以十月純坤用事言之則一月三十日又豈可云
七日而復也設以六日七分之說為然既云一卦主六
日七分則十月一月已隔五卦非只坤之一卦明矣如
以日推之既乾之策二百一十有六坤之策一百四十

有四凡三百有六十當暮之日則是三百六十日乾坤
二卦之策已備矣卦主六日七分者漢之易家皆無此
說惟京生分六十四卦更直日用事以候風雨寒溫言
災變之術固已妄矣非聖人設卦垂教之本意也

卦變論說

王

炎

文獻志

卦變之說謂乾坤為父母而姤復為小父母六畫成卦
凡一陽五陰皆自復變一陰五陽皆自姤變二陽四陰
皆自臨變二陰四陽皆自遯變三陽三陰皆自泰變三

陰三陽皆自否變其說不聞於先儒而言於邵氏至漢上朱氏從之且乾坤為父母其交則為三男三女復卦上坤下震震乃乾一索而得男姤卦上乾下巽巽乃坤一索而得女若復姤為小父母則姤有乾復有坤乾坤反係復姤所生而震巽二卦亦非出於乾坤不知從何而來且夫子象易嘗言剛柔之變惟賁尤詳曰柔來而文剛分剛上而文柔諸家即曰賁自泰來蓋祖邵氏說也然賁上艮下離坤體得乾一剛而成艮是謂柔來而

文剛剛柔相反出於乾坤之變夫子之言如此未聞其
言泰變為賁也且雜卦首曰乾剛坤柔自乾坤生六子
則剛柔相雜故六十四卦其剛皆出於乾其柔皆出於
坤剛來文柔為隨柔進上行為晉剛來而不窮柔得位
乎外而上同為渙皆剛柔之變也且隨上兑而下震初
上二爻不變則為乾坤變則坤之初居在上六五以柔
而居君位故曰柔進而上行渙上巽而下坎得乾之
剛而為中爻今居二而得中是謂來而不窮巽得坤之

一柔而為初爻今居四而附五是謂柔得位而上同然則凡卦二陰二陽變為臨遯三陰三陽變為泰否夫子未嘗言而邵氏之徒言之諸家皆從其說此吾所未曉也朱子發用卦變以解經至无妄而力主其說且曰无妄上乾下震若震一爻其剛自乾來則上卦未嘗損乾一剛是卦四體二柔自臨遯而變明矣然詳觀夫子之言於隨於渙皆曰剛來則是上卦一剛來而為初二兩爻於无妄獨曰剛自外來加一外字則其初未嘗損上

卦之一剛也蓋大畜上艮下乾則一剛在外反為无妄則艮變為震或謂大畜一剛在內自外來者自大畜而來也敘卦先无妄後大畜謂大畜剛上自无妄而變可也謂无妄剛自外來由大畜而變於敘先後不合殊不知敘卦先无妄而後大畜雜卦又先大畜而後无妄謂剛自外來由大畜而變何不可之有其說亦未盡蓋无妄儲貳之卦上乾為父下震為長子不損乾之一剛所以見其父道之全震為長子初有一剛實自乾而得之

故夫子加外字以別之也況反對自與變卦不同子發以反對為變卦則尤失之蓋邵氏之學長於占筮文王之演易不專於占筮也靜而正心誠意動而開物成務易皆具焉惟以占筮論之則古人如管輅郭璞之徒足以盡易之道矣不特邵氏也讀易者捨夫子所已言求夫子所未言恐非聖人意也卦變之說存而勿論斯可矣

論卦變

章俊卿

始虞氏卦變乾坤生坎離乾息而生復臨泰大壯夬坤

消而生姤遯否觀剝自復來者一卦豫自臨來者四卦

明夷解自泰來者九卦蠱賁恒損井歸自大壯來者六

卦需大畜大過睽鼎兌自夬來者一卦同人自遯來者五卦訟无妄家人革

巽自否來者八卦隨噬嗑咸益困漸渙未濟自觀來者五卦晉蹇頤萃艮

自剝來者一卦謙而屯生於坎蒙生於艮比生於師頤

小過生於晉睽生於大壯或生於无妄旅生於賁或生

於噬嗑中孚生於訟小畜變需上復變訟初姤無生卦

師同人史大有兌四卦闕李鼎祚取蜀才盧氏之書補其三卦變而頤卦虞以為生於晉侯果以為生於觀今以圖考之其合於圖者三十有六卦又時有所疑不合者二十有八卦夫自下而上謂之升自上而下謂之降升者生也息也降者消也陰生陽陽生陰陰復生陽陽復生陰升降消息循環無窮然不離於乾坤一生二二生三至於三極矣故凡卦五陰一陽者皆自復來復一爻五變而成五卦

同人履小畜大有夬

凡卦四陰二陽者皆自臨

來臨五復五變而成十四卦

明夷震屯頤升解坎蒙小過萃觀蹇晉艮

凡卦

四陽二陰者皆自遯來遯五復五變而成十四卦

訟巽鼎大

過无妄家人離革中孚大畜大壯睽頤兌

凡卦三陰三陽者皆自泰來泰三

變而成九卦

歸妹節損豐既濟賁恒井蠱

凡卦三陽三陰者皆自否來

否三復三變而成九卦

漸旅咸渙未濟困益噬嗑隨

乾坤大父母也

姤復小父母也坎離得乾坤之用者也頤大過小過中

孚或曰先儒謂貴本泰卦豈乾坤重而為泰又由泰而

變乎曰此論之卦也所謂之卦者皆變而之他卦周易

以變為占一卦變而為六十四卦六十四卦變而為四千九十六卦而卜筮者尚之也焦延壽之易林所以興也聖人因其剛柔相變繫之以辭焉以明往來屈伸利害吉凶之無常也故君子居則觀其象而玩其辭動則觀其變而玩其占占與辭一也故乾坤重而為泰者八卦變而為六十四卦也由泰而為賁者一卦變而為六十三卦也

林氏曰易曰剛柔相易皆本諸乾坤也凡三子之卦言

剛來者明此本坤也而乾來化之凡三女之卦言柔來者明此本乾也而坤來化之故凡言是者皆三子三女相值之卦也非是卦則無是言也謂泰變為賁此大惑也曰不然也往者以內外言也自內而之外謂之往自外而之內謂之來請復借賁卦言之柔來而文剛者坤之柔自外卦下而來文乎乾之剛也分剛上而文柔者乾之剛自內卦上而往文乎坤之柔也於柔言來則知分剛上而文柔者往也於剛言上則知柔來而文剛者

下也上者出也下者入也此所謂出入以度内外此所謂上下無常也若言柔來者明此本乾也則不當分剛上而文柔當曰剛來而文柔也无妄之象曰剛自外來而為主於内外卦乾已三畫矣謂之自外來則當卦外來乎故乾施一陽於坤以化其陰而生三子坤施一陰於乾以化其陽而生三女者乾坤相易以生六子成八卦也上下往來周流無窮者剛柔相交以盡其爻之變也故爻之言往來言上下内外者豈惟三子三女相值

之卦而已哉

論八卦生六十四卦

全君卿

李衡

乾坤之生六子可得而知也八卦之為六十四其可得而知乎不牽於數不惑於氣而後可知也夫易固有數而八卦之成列不可以數言也卦固有氣而六爻之適變未可以氣言也以數而言者求於八卦之先而未至於象也以氣而言者轉於六爻之後不歸於象也求於八卦之先而牽於數故謂坎離先天地得於六爻之後

而惑乎氣故謂卦氣起中孚蓋數與象與氣於卦之相生其迹甚近而其理甚微宜乎說者之不能別而紛紜於其間也譬之於人其智愚壽夭者數也其四體具者象也其動息語默者氣也今日之曰人者將以其智愚壽夭與其動息語默之如何而稱之耶亦以其四體之具而稱之耶其生而智愚壽夭則置而不言其動息語默之何如則未議及之蓋有生而後有動息語默數之與象象之與氣亦何異於是是有數而後有象有象而後

知其氣也有數而後得其象是以三畫為乾而六畫為

坤謂之乾坤而

闕

六則卦之相生不可以數言而

可以象言也有象而後知其氣是以有復之象而後明
之曰七日來復有臨之象而後推之曰八月有凶則卦
之相生可以象言而未可以氣言也苟質之於經以乾
坤為之始以六子為之次敘不為異端小說之所奪一
本於象以求六十四卦始終之變則其誰曰不然聖人
之言曰震一索而得男故謂之長男巽一索而得女故

謂之長女坎再索而得男故謂之中男離再索而得女
故謂之中女艮三索而得男故謂之少男兌三索而得
女故謂之少女其言曰震一索而得男巽一索而得女
者猶言曰一索而得震為男一索而得巽為女也此諸
卦相生之法也夫陰陽者相求之物也由其相求而後
有生生之用成萬物之象焉是以乾坤之位定八卦之
爻重陰必求陽陽必求陰始於一陰一陽之相求六子
以次而生再變而窮十有二卦之象成矣乾之初求於

坤得震而為長男則謂之復坤之初求於乾得巽而為
長女則謂之姤乾之二求於坤得坎而為中男則謂之
師坤之二求於乾得離而為中女則謂之同人乾之三
求於坤得艮而為少男則謂之謙坤之三求於乾得兌
而為少女則謂之履此其一變也乾之四求於坤得震
而為長男則謂之豫坤之四求於乾得巽而為長女則
謂之小畜乾之五求於坤得坎而為中男則謂之比坤
之五求於乾得離而為中女則謂之大有乾之六求於

坤得艮而為少男則謂之剝坤之六求於乾得兌而為少女則謂之夬此其再變而窮也以此而推其中則二陰二陽之相求六子以次而生起於屯鼎四變而窮而二十四卦之象成矣又以此而推其終則三陰三陽之相求六子以次而生起於否泰三變而窮而十有八卦之象成矣與夫求之於數得之於氣而涉乎異端之說之紛紜者孰為簡易哉

先甲後甲之義

熊朋來

或問蠱之先甲後甲有以甲子戌申為先甲午辰寅為後者有以丁辛為甲三日之先後者巽之先庚後庚有以庚午辰寅為先庚子戌申為後者有以丁癸為庚三日之先後者不知蠱何取於甲巽何取於庚也曰蠱隨相伏蠱之三陰隨之三陽伏焉蠱初爻變大畜則內卦為乾先甲也至五爻變无妄則外卦為乾後甲也蠱之彖傳言先甲後甲曰天行也所以言甲者乾甲也巽震二卦亦相伏所以言庚者震庚也又問乾甲震庚於納

甲通矣蠱之先甲後甲於卦辭言之巽之先庚後庚於九五爻辭言之何也蠱隨反對以卦之全體得乾故言先甲後甲於卦辭也重巽伏震先庚也九五變則三至五又互震後庚也周公因蠱之乾甲記巽之震庚巽九五變為巽之蠱六五變為蠱之巽庚甲相直巽蠱相入特於五爻言之宜也三日者或曰三爻也

互論

陸 東

夫聖人之作易也假三才日月陰陽寒暑剛柔逮乎萬

物之象以為之教而已故伏羲之始得奇數於天得偶數於地以為剛柔二畫因而六之以剛為乾天之象也以柔為坤地之象也既生六子而遂至六十四焉故上世聖人觀畫知化而自取足焉後之人不能究也故文王為之繇周公辭其爻仲尼翼其經且曰夫乾陽物也剛且健有馬之象夫坤陰物也柔且順有牛之象焉是則既明其乾意曰剛坤意曰柔闕道矣經曰乾元用九見羣龍无首吉蓋言既剛之純也不可復剛焉必也

无首而後得又曰坤元用六利永貞蓋言既柔之純也
不可復柔焉必也永貞而後可輔嗣曰九天之德也能
用天德乃見羣龍之義焉夫以剛健而居人之首則物
之所不與也以柔順而為不正則佞邪之道也故乾吉
在无首坤利在永貞康伯曰所貴剛者閑邪存誠含洪
居中順而不失其正者也若剛以厲物則非剛之道柔
以卑佞則非柔之義是以聖人假乾坤剛柔二理以為
教而已夫既明乎无首永貞之義則六九可遺而羣龍

无取矣今徒譎譎曰六九何數也羣龍牛馬何類也無乃棄意泥象之甚而於聖人之意戾耶先儒如虞翻崔憬輩之用互體如京房郎顗輩之用五行去聖人遠矣

互卦附象

洪邁

隨筆

易繫辭云雜物撰德辨是與非則非其中爻不備中爻者謂二三四及三四五也如坤坎為師而六五之爻曰長子帥師以正應九二而言蓋指二至四為震也坤艮為謙而初六之爻曰用涉大川蓋自是而上則六二九

三六四為坎也歸妹之六五曰帝乙歸妹以下配九二而言蓋指震也而泰之六五亦曰帝乙歸妹固亦下配九二而九三六四六五蓋震體云他皆類此

易卦辭稱利涉大川者七不利涉者一爻辭稱利涉者二用涉者一不可涉者一需訟未濟指坎體而言益中孚指巽體而言渙指坎巽而言蓋坎為水有大川之象而巽為木木可為舟楫以濟川故益之彖曰木道乃行中孚之彖曰乘木舟虛渙之彖曰乘木有功又舟楫之

利實取諸渙正合二體以取象也謙蠱則中爻有坎同
人大畜則中爻有巽頤之反對大過方有巽體五去之
遠所以言不可涉上則變而之對卦故利涉云

易中所言魚皆指巽也姤卦巽下乾上故九二有魚九
四无魚井内卦為巽故二有射鮒之象中孚外卦為巽
故曰豚魚吉剝卦五陰而一陽方一陰自下生變乾為
姤其下三爻乃巽體也二陰生而為遯則六二九三九
四乃巽體三陰生而為否則六三九四九五乃巽體四

陰生而為觀則上三爻乃巽體至五陰為剝則巽始亡
故六五之爻辭曰貫魚蓋指下四爻皆從巽來如魚駢
頭而貫也或曰說卦不言巽為魚今何以知之曰以類
而知之說卦所不該者多矣如長子長女中女少女見
于震巽離兌之中而坎艮之下不言為中男為少男之
類他皆可推也兌為羊易之稱羊者凡三卦夬之九四
曰牽羊悔亡歸妹之上六曰士刲羊无血皆兌也大壯
内外卦為震與乾而三爻皆稱羊者自復之一陽推而

上之至二為臨則兌體已見故九三曰羝羊觸藩羸其角言三陽為泰而消兌也自是而陽上進至於乾而後已六五喪羊于易謂九三九四六五為兌也上六復觸藩不能退蓋陽方決決豈容上兌儼然乎九四中爻亦本兌而云不羸者賴震陽之壯耳蹇卦艮下坎上見險而止故諸爻皆有蹇難之辭獨六二重言蹇蹇說者以為六二與九五為正應如臣之事君當以身任國家之責雖蹇之又蹇亦匪躬以濟之此解釋文義之旨也若

尋繹爻畫則有說焉蓋外卦一坎諸爻所同而自六二推之上承九三六四又為坎體是一卦之中已有二坎也故重言之解卦坎下震上動而免乎險矣六三將出險乃有負乘致寇之咎豈非上承九四六五又為坎乎坎為輿為盜既獲出險而復蹈焉宜其可醜而致戎也是皆中爻之義云


論林黃中易

朱熹

林侍郎黃中論易有太極是生兩儀兩儀生四象四象

生八卦就一卦言之全體為太極內外為兩儀內外及互體為四象又顛倒取為八卦先生曰如此則不是生却是包也始畫卦時只是箇陰陽奇偶一生兩兩生四四生八而已方其為太極未有兩儀也由太極而後生兩儀方其為兩儀未有四象也由兩儀而後生四象方其為四象未有八卦也由四象而後生八卦此之謂生若以為包則是未有太極已先有兩儀未有兩儀已先有四象未有四象已先有八卦矣林曰惟其包之所以

生之也先生曰包如母之懷子子在母中生如母之產
子子在母外



稗編卷四